


## SHABAN CAKOLLI- POEZI



Shaban Cakolli u lind në Krilevë të Dardanës(ish-Kamenicë).Shkollën fillore e kreu në vendlindje,të mesmen në Dardanë,kurse studimet në Fakultetin Filologjik të Universitetit të Prishtinës. Me shkrime ka filluar të merret qysh si nxënës. Shkruan poezi,prozë dhe publicistikë. Shkrimet e tij janë botuar në gazeta dhe revista që botohen në Kosovë dhe diasporë. Jeton dhe krijon në Gladbek të Gjermanisë.

Ka botuar vëllimet poetike:"TOKË DARDANE", "LOTI I ATDHEUT", "DETI I QIELLIT" dhe "KRISMA E FJALËS",kurse ka në dorëshkrim edhe disa vëllime tjera. Disa shkrime të tij janë përkthyer në gjuhën gjermane,turke dhe kroate. Është i përfshirë në antologji gjermane dhe disa antologji poetike shqipe në Kosovë dhe diasporë si dhe është në Lidhjen e Shkrimtarëve Artistëve dhe Krijuesve shqiptarë në Gjermani(LSHAKSH).

## POETI

Nuk e di  
nëse trupi i pikon gjak  
brenda tij  
kallet një oxhak!

Në mes mallit e dhembjes  
unë qe kallet  
digjet ne heshtje-behet prush  
dhembjet e tij  
si kupton askush!...

## DARDANIA

Trupin ne vale  
emrin ne flake  
Dardania plake.

Ne vale -nuk mbytet  
ne flake-nuk kallet  
jeton-nuk ndalet.

Ne gjak-ujitur  
plagosur ne zemër  
prape jeton-ka emër.

Erdhi neper furtune  
trupin -flori  
emrin-Liri.

## PLAGË NË ZEMËR

Kam një plage  
me djeg shume  
me djeg zgjuar  
dhe ne gjumë.

Me djeg ne zemër  
e dashur nëne,  
me dhemb ne shpirt  
e dashur Dardane.

# VETMIA

Vetmia brenë  
nuk të lë të qetë  
ajo ka fole  
burgun e vërtetë  
dhe të bëhet e pa duruar  
kur dikush për te  
të kenë detyruar  
por çuditërisht  
or miku im  
nganjëherë vet  
e kërkoj vetminë  
se shpesh vetmia  
më lindë frymëzimin  
më ndihmon qetësia  
të furi mendimin.

# NË PREKAZ ZË FILL LIRIA

Kosovë-zemra e Dardanisë  
shumë pushtues të janë vardis  
saherë ata janë dalldisë  
grusht të rëndë kanë marrë në Drenicë  
edhe tash-një shekull pas  
iu bë varri në Prekaz  
në PREKAZ u mund robëria  
në Prekaz zë fill Liria  
Jasharajt matën trimërinë  
pa pushtues e bënë Shqipërinë.

# Fjala juaj

Në kujtesë do mbetet  
ajo fjalë  
që vjen maleve  
me flakën e kushtrimit  
heu  
kush është trim  
se ora ka ardhë  
ujkun e çalë  
ta heqim zvarrë

## Unë dhe malli

Tërë natën bashkë  
unë dhe malli

na mbyti halli  
i kësaj jete jallane

Kur s'kam gjumë fare  
ndez një cigare  
bregat t' kthej ne tym.

## Shtrëngim

Në dhomën e errët  
flakë m'u ndiz trupi  
kur foli matufi  
me një qilim xunkthi  
duke fluturuar

Ra në fushë  
mes një kënete  
që i vinte era parfum.

Druaj se djalli  
me xixa stralli  
na vizaton yllin  
midis balli

Vijnë pastaj hienat  
t'i grisin pelenat  
e foshnjave të pa lindura  
.

Këta këlysh popi  
soji e sorollopi  
që të pinë gjak populli  
shekulli s'i ngopi

Në këtë rreth harkor  
të rrugëtimit mizor  
vetëm lëmshi i fatit  
na mbeti në dorë

# Fjala e humbur

Mbeta pa fjalë  
a ditën kur jam nisur në jetë  
rrugëve të parrugë  
në dritë e mugë

Në guvën e shpirtit  
ndryrë është qe një shekull  
e betuar nën dritë qiri  
para ikonës sate  
liri

# E gjatë kjo natë

Sonte  
gjithçka po fle në qetësinë ë vet

Në dhomën time  
qielli i ka ndezur fanarët  
të mos tremben  
qelizat që tajisin  
lëngun e jetës

të gjatë shekujt  
që flenë dhomat flenë qytetet  
sonte gjumë nuk kanë vetëm poetët  
bëjnë qarqe,  
nëpër vargje  
të regjur si gëzofët  
shkrihen në vuajtjet e popullit.

## E ndiej humbjen

Viti shkel vitin  
pesha bie  
pingul në shpirtin tim  
tretur në mërgim

Një pjesë e diellit  
m' është shkëputur  
nga qielli i bebëz  
nga hija e lotit tim  
derdhur  
në dhe të huaj

Nëse unë s' kthehem  
hija ime do të bredhë  
trotuareve të nënbotës  
pas mallit tim

Për çdo natë  
e bëj nga një shtegtim  
në mendje  
për në shtëpi  
për amanetin e nënës  
para se të japë lamtumirën  
pranverave të ikura pa kthim

## Hall mbi hall

Turma shkojnë  
turma vijjnë  
mbijnë si bari i keq  
në faqen e blertë të globit

Prej shekulli në shekull  
kërkojnë lëmoshë  
trotuareve të fatit

Trokasin në portë të hapur  
kastat luksoze  
të ngopura parfumeshe  
të një biznesi të ndyrë

# Ora jonë

Gjurmë pas gjurme  
bjeshkë pas bjeshke  
na ndoq sëpata shpatën  
nëpër shekuj

Këtu varrë e atje varrë  
më bëhet shpirti mulli ere  
në skëterrë pas skëterre  
deri kur të bredh me bredh  
kështu, o shpirti im?  
nga të palarat  
e botës pelim

Këtu s' jam  
atje s' më lënë,  
o nënë

qenia ime e ndarë në dysh  
në udhëkryq

# E bukura More

Moj e bukura More  
si të lash, e më s'të pash  
si të lash, si të lash  
si të lash, e më s'të pash  
(popullore)

Ec nëpër të kaluarën  
për ta gjetur të ardhmen  
ëndërro shqip,  
frymo shqip  
o Arvanit

Hy kalabrishte  
i dehur mendimeve  
arbërisht  
e jetën vazhdo  
prore  
e dasmën  
bëje pleqërisht

Edhe varrin hape  
me E bukura More

Rro sa malet  
me dhembjen shkëmbore  
buzë detit  
me shikim të humbur  
nga e bukura More

## Ty që po vjen

Në këtë botë  
erdhëm njëlloj  
me rregullat e ngurta  
të natyrës

A lejon natyra  
pamjet me dy fytyra

Njëri maskë  
laraskë  
në atë degë të fatit  
që çukit  
kokrrat e inatit

Me kurriz për murriz  
tjetri kruan  
unazat e shekullit

## Lamtumirë

Tërë kohën u rropate  
për këtë jetë bajate  
ndërtoje kulla prej letre  
rrokaqiej e pallate

Atë që bëje ditën  
rrënoheshin brenda nate

Falë të qoftë  
o miku im  
ky mashtrim



## Kam një plagë

Kam një plagë  
që më djeg flakë  
dhembje që më zgjon nga gjumi  
si me një ushtimë lumi  
tek vërshon në këtë anë  
nëpër Dardanë.

## Kosovës

Kosovë  
copë fushë e Edenit  
me përmasa ëndrre  
me qiellin  
përplot shqiponja  
që ngrenë çerdhe  
nëpër zemrat tona

## Për ty, dritë

Flakadan lirie  
që n ndriçonte nëpër zemrat tona  
me shekuj

Shekull pagjumësie  
është ky  
c' të bëjmë me ty  
në cilin qerpik  
si në shandan  
të vëmë  
në cilin qiell  
të bebëzave tona  
të grisura

Tokë e shenjtë  
e Kosovës  
me këtë florë  
të kuqe gjaku  
me xixëllonja stralli  
që dalë kanë  
NGA LIMFA JONË

# Në brendi

Këndeje gjithë zjarr  
e andej akull  
vetëm gjurmë  
e kthetrave  
të stinës në xham

Zjarri djeg  
leekat e stinës së ikur  
nga fryma e detit  
të strukur në gjethe bajameje

Një syth ëndrre  
zënë e ka zogun e bilbilit  
ne kafaz

# E gjatë kjo natë

Sonte  
gjithçka po fle në qetësinë ë vet

Në dhomën time  
qielli i ka ndezur fanarët  
të mos tremben  
qelizat që tajisin  
lëngun e jetës

të gjatë shekujt  
që flenë dhomat flenë qytetet  
sonte gjumë nuk kanë vetëm poetët  
bëjnë qarqe,  
nëpër vargje  
të regjur si gëzofët  
Shkrihen në vuajtjet e popullit.

## As në jetë, as në varr

Më humbi shoku i shpirtit  
e zhdukën pa gjurmë  
këlyshët e ferrit

S' është askund  
as në jetë  
as ndër varre.  
s' është më hija e tij

Ai s' është askund  
se është gjithkund  
duke u dhënë shpirt  
gurit e drurit

## LETRA E NËNËS

Më çoi nëna letër

shkruar më kishte  
me lotët e saj

Liqe i pafund  
dukej pika e mallit  
që derdhur ish  
nëpër fjalë

Më shkroi nëna letër  
dhe një liqe malli  
e ktheu në avull  
vetëm me një fjalë

# E ndiej humbjen

Viti shkel vitin  
pesha bie  
pingul në shpirtin tim  
tretur në mërgim

Një pjesë e diellit  
m' është shkëputur  
nga qielli i bebëz  
nga hija e lotit tim  
derdhur  
në dhe të huaj

Nëse unë s' kthehem  
hija ime do të bredhë  
trotuareve të botës  
pas mallit tim

Për çdo natë  
e bëj nga një shtegtim  
në mendje  
për në shtëpi  
për amanetin e nënës  
para se të japë lamtumirën  
pranverave  
të ikura pa kthim

# Nën qiellin e huaj

Ky qiell mbi rrokaqiell  
dhe jeta jonë drithë e miell  
brenda mureve të betonit  
vshket e pafaj  
në këtë nënqiell

Deri në asht unë kam acar.  
dhe duhet të mbulohem  
me një re të trashë tymi  
ose të pëlcas si tullumbace  
në duart e një fëmije bonjak  
e gjuajtur  
nga një shigjetë acari

Zemra ime e mërdhirë  
del gjysmëlakuriq të shëtisë  
nëpër kopshtin e mbuluar me vesë

# Buzë lumit Rajna

Buzë lumit Rajna  
mbi syprinën e ujit  
hijen mallit e ndeza  
tani jam pa hije  
i lehtë si avulli  
si një hije malli  
që ka rënë mbi ujë

## Me shtegtarët

Bashkë me dallëndyshet  
u nisëm  
për një ditë shtegtimi

Kaluam fusha  
lumenj dhe detra  
për ta gjetur folenë  
e stërgjyshërve pellazg

Kur vinin pranverat  
dhe bora shkrihej  
në diell shfaqej  
strofulli i lashtë  
në një dege të tharë

## Kur dola prej shtëpisë

Kur dola prej shtëpisë  
ia dhashë flakën rinisë

Si qen e tërbuar  
lehte uria  
e skamnorit  
në dheun e huaj

Erdhi koha për t' u nisë  
dhe i thash nënës  
të ma varë atë bazybe  
në qafë  
që të më ruaj  
nga syri i keq i mërgimit

Zemra e nënës  
u vyshk për një minutë  
siç vyshket lulja nën brymë  
dhe zemra e mërgimtarit nga malli

Një vaj i padukshëm  
ma dridhi buzën  
dhe s' mund të them  
asnjë fjalë malli  
për tokën që po e lë

# Malli për kroyin e fshatit

Ngjiten vashat shpatit  
shkojnë te kroyi i fshatit  
të buta si delet  
i zbkurojnë belet  
kur ngjesin kordelet.

Qafat me rruzare  
n'kostume shqiptare  
qëndisur me rreze

Kroyi i fshatit  
ujë rrjedh teposhtë  
nga fushat  
për t'i çmendur çunat  
për t'i joshur çupat

Tani më zgjon etjen  
në këtë tokë mërgimi  
malli më djeg shtatit  
për kroyin e fshatit

# Nënë, moj, nënë

Kur u ndava nga ti  
o nënë  
qava natën e tërë  
se kisha mall  
për një fjalë tënden

Kur m'i këndoje ninullat  
o nënë  
në gjoksin tënd.  
fluturoja në qiell

Më ty për dore  
hapëroja nëpër oborre  
dhe sot  
më merr marrë malli  
të më marrish përdore.  
o nënë

Rrudhat e pleqërisë  
sa të hijshme i kishe  
si vija të dritës të yjeve në qiell  
në netët plot hënë

Sa më ka marr malli  
për një bukë  
nga dora jote.  
o nënë  
për një bukë misri  
me shije fëmijërie

Si zgavër lisi  
zemra më është bërë  
ke era fsheh borën  
për flokët e mia

Edhe zogjtë e malit  
nëse më thërrasin  
t' i lot mos lësho  
qëndro dhe më prit  
se do të kthehem një ditë.

## Në vizion

Në një kopsht në Osnabrück  
me një me një dallëndyshe u bëra mik

Zemra bëri benë  
se do t'ia ruaj folenë  
derisa të kthehet nga shtegtimi

Iku duke më përshëndet  
me krahun e lehtë.  
zogu i shkretë

Kalon detëra edhe toka  
të sjell të fala  
nga Shiroka

N' ma pashë nënën me lot në sy  
ajo qanë edhe për ty



# Kam një hall

Kam një hall  
më të madh se lumi  
me net të tëra .  
s'më zë gjumi  
kështu dje  
kështu sot  
i përgjumur nëpër glob  
mbuluar prej luksi

Anonim  
në azil  
pa mik e me myk  
i mbyllur në terr  
endem nëpër vetvete  
në anonimitet rroj  
e vdes ngapak  
çdo ditë

# I zhdukur

Një gotë verë  
një cigare  
si në odat  
shqiptare  
shuaj mallin e vendlindjes

Pa shtëpi e katandi  
shteg i humbur  
në stinë vjeshte

Jam shumë larg  
vetë syrgjyn  
me një gotë  
dhe tym duhani  
rendis ditët  
në rruzaret e vitit

# Kush jemi

Kështu ishte  
kur jetë  
bënim me dreqërit

Brejtësit na e grisnin  
dokumentin e identitetit  
të mos e njohim  
as shëmbëlltyrën tonë  
në ujin e pusit

Na pyesnin: Kush jeni?  
nga vini?  
a ke dëshmi  
për identitet

Ja këtë kartë ndërkombëtare  
se këtu kemi ardhur  
nga ferri ynë  
se jemi në thelb  
origjinal

# Vizionarit I. Rugovës

Jeta  
hije e vogël  
Për ëndrrën tonë  
të madhe

Mbyll një portë  
hap një portë  
për të dalë në një moshë tjetër

Edhi dita  
t' mbledhim frutat  
në atë pemë të jetës  
në mungesën tënde

Dita e dhimbje se madhe

N'shekuj morti  
u rritën brezat  
duke pritur  
të vish ti  
me një fanar ardhmërie në dorë

Tani një diell i kuq  
rri varur  
në atë degë të  
të bleruar  
në pemën e jetës

Ai iku  
po një brerore lirie  
ndriçon përjetësisht  
në atë afresk  
me portretin tënd

## Antihistorike

Sa herë ia shikoj fytyrën  
mësuesit të historisë  
më bëhet se lexoj  
një pergamenë të lashtë  
të zhubrosur nga vitet

## Rrugës për në qiell

Sa herë mbi çati  
na këndonte korbi  
nëna e mallkonte  
thoshte: këndon morti

Shenjat e shenjta  
të krahut të shqiponjës  
u dukën në qiell  
dhe në palcën tonë  
rrymoi liria

# Erdhi ora

Pabesitë e bardha  
nga shekulli në shekull  
mallin për liri s'na shuan

Brigjeve të ëndrrave  
u përplas akullnaja  
në rropulli  
u trand liria  
e ujqërit ulëritën  
e bjeshkët gjëmuar  
e u trembën majet me dëborë  
se erdhi ora  
e flakës së pashuar  
të zjarrit ilir

Dielli ka shndritur  
qiellin e zemrave tona  
se jehoi zëri i Ademit  
se Hamza i zu pritën  
jehut të kushtrimit

i gjallë apo i vdekur  
i Besëlidhjes së Gjergjit  
jam për jetë

# Ne udhëkryq

Këtej vihet  
andej shkohet  
rrugët tona  
s'mund të ritakohen.  
në brendi  
shpalos kujtimin  
tëndin dhe timin  
i vogël është hapi im  
pafund  
veç mall e trishtim.

## Përse më ike

Më ike  
o mike,  
me mëngjesin  
e vjeshtës  
më le  
me hirin e mallit  
të ruajë  
atë gacë të fshehur  
të dashurisë

Mbeta në udhëkryq  
të dashurisë  
me sy kah qielli  
duke pritur  
pikat e lotëve të tu  
që do t'i sjellin  
retë ë kësaj vjeshte

## E vërteta

Kur kreshnikët tanë  
i hapën hartat  
atyre në duar  
iu dogjën kartat

Lartmadhëria  
mbet lakuriq  
para pasqyrës  
u bë gaz i botës  
karikaturë e gjallë  
që të bën më lot  
të qeshësh

Gomari që shtihej ujk  
mbeti pa lëkurë  
dhe filloi të pëlliste  
deri në kupë të qiellit

Vetëm kur në gjyq  
e depozitoi mendjen  
u pa sheshit  
se burri i botës  
për mburrje e kishte  
trurin e gomarit

# Lot Kosove

Sllav e shkja  
dhe djalli i zi  
na lakmuan edhe gjelbërimin  
e fushave tona  
në sy

As me vetveten s' lanë  
të flisnim njerëzisht  
për njerëzimin  
se njerëz s'ishin

Shkelnin tokën tonë të bukës  
me thundrat e tyre  
me brirë thernin  
qiellin e kaltër  
të bebëzave tona

Zjarrin që ka Kosova  
për liri tund dheun  
dhe shpërthen  
deri në qiell  
duke djegur e pjekur  
mustakët e miu  
në fytyrat satanike

Kur shiu i lotëve pushoi  
rreze lëshoi liria  
dhe me foshnje u mbush shtëpia.

# Emër i nëmur

Udhëtarë të territ  
hyjnë dhe dalin  
nga dera në derë  
ecin për teh të thikës  
duke u përpjekur  
të kërcejnë në humnerë  
hapur në anatemë  
si fëmijë të humbur  
thellë në pyll  
lajkash e trishtimi

U lexohet në dritën e syve  
mallkimi i territ  
ngrysen e gdhihen  
me një vel mërzie

Nuk kanë shteg as prag  
s' dinë kah nisen,  
as ku ndalen  
me këtë rrugë muge  
emër të nëmur  
kurbeti

## Jetë e vaj

Rrodhi përroska ujë loti  
rrodhi kot së koti  
kur ndryshoi moti

Në katër anët e globit  
rri buzë trotuari  
duke shikuar  
ndërrimin e ngjyrave në semafor

Kërcitën kockat nga reuma  
kur filloi riga e shiut  
të bjerë nga ai qiell kuq e zi

Në gjysmë u ngrit flamuri.  
flamuri i kuq  
i larë me gjak  
për këtë jetë të pafaj

## Mërgimtari

Larg atdheut  
larg shtëpie  
të shkuan vitet  
sikur hije

Vetëm agimi i djalërisë  
hap portën e kujtimeve  
dhe në fushat e bleruara  
të viteve  
një çunak këmbëzbathur

mbledh Lulenarçizi

E shkurtër është jeta  
si një shirit celuloidi  
që fillon në kujtime  
dhe mbaron në një beze të bardhë  
në murin e moshës

Imazhe gri  
si bryma e flokut tënd  
ngrin e shkrin në lëvizje  
të përhershme  
të ëndrrës

.  
Rini e thinjur  
stacioneve  
presin e përcjellin  
vagonët me radhë  
që bredhin nga stina në stinë